

# NEWSLETTER

*maj 2024.*



**FONDACIJA**  
HASTOR

# PREDAVANJE ZA STUDENTE STIPENDISTE – ESG i njegova važnost za budućnost poslovanja

U subotu, 25. maja 2024. godine održano je predavanje za stipendiste Fondacije Hastor, studente pravnih, ekonomskih i srodnih fakulteta. Naša gošća Merima Hrapović, viša konsultantica u društvu Deloitte, za naše stipendiste održala je predavanje o temi ESG-a tokom kojeg je istakla ključne aspekte ESG-a i njegovu važnost za budućnost poslovanja.

ESG u prvom redu uključuje tematske okvire ključne za zaštitu okoliša, kao što su klimatske promjene, emisije stakleničkih plinova, korištenje resursa, upravljanje otpadom i očuvanje prirodnih staništa, potom, u drugom redu, društvene faktore koji obuhvataju odnose kompanije s njenim zaposlenicima, dobavljačima, kupcima i zajednicama u kojima posluje te, u konačnici, faktore koji kreiraju dobre upravljačke prakse, čime se doprinosi sprečavanju korupcije i osiguravanju odgovornog donošenja odluka. Naša gošća potrudila se da temu na najbolji način približi našim studentima, a upoznavanje s ovom temom pružilo im je dragocjene uvide u nefinansijsko izvještavanje i održivi razvoj. Studenti su imali priliku saznati kako ESG izvještavanje može utjecati na poslovne strategije i kako mogu primijeniti ove koncepte u svojoj budućoj karijeri.

Naša stipendistica Kanita Obhodaš, studentica druge godine Pravnog fakulteta Univerziteta u Sarajevu, podijelila je s nama svoja iskustva s ovog predavanja:

*Mjesečni susreti, sada već tradicionalni, zasigurno su ono čemu se svi stipendisti studenti najviše raduju. Ovoga puta slušali smo o temi za koju smo svi čuli, ali jako malo znali te nam je predavanje bilo izuzetno korisno. ESG je tema koja se posljednjih godinu dana proteže kroz različite segmente obrazovnog sistema, no informacije koje smo dobili na radionici bile su praktičnije. Posebno mi se svidjela interaktivnost i razmjena mišljenja tokom samog predavanja. Smatram da je cijelo predavanje bilo jako dobro strukturirano. Početak je bio baziran na davanju osnovnih informacija, zatim smo analizirali praktične primjere te smo završili upravo Q&A sesijom. Iskustvo koje nam je prenijela gošća Merima Hrapović zasigurno će nam donijeti velike benefite prilikom budućeg zaposlenja.*

Ovo predavanje bilo je posebno korisno jer će se većina firmi u budućnosti okrenuti ovom načinu rada što će povećati potražnju za stručnjacima koji razumiju ESG principe. Stoga, znanje stečeno tokom predavanja može studentima pružiti konkurentsku prednost na tržištu rada i pripremiti ih za uspješnu karijeru u savremenom poslovnom okruženju.

**Pripremila: Hana Hajrić**



# Mahira Amidžić

**Dobra djela nas obogaćuju, a mi postajemo plod naših djela,** zapisao je svojevremeno Miquel de Cervantes. U okviru Fondacije Hastor, filantropski duh dimenzija je koja se prožima kroz volonterski angažman. Na taj način se postavljaju temelji entuzijazma i solidarnosti među stipendistima, a isti su vođeni vizijom društvene odgovornosti i pozitivnih promjena. Njihov aktivni doprinos, u skladu s ciljevima Fondacije Hastor, ima značajnu ulogu u poboljšanju društvene zajednice. U rubrici Stipendista mjeseca ističemo pojedince koji svojim aktivizmom doprinose pozitivnim promjenama u našoj zajednici, odražavajući vrijednosti Fondacije. Svojom ulogom u Fondaciji Hastor **Mahira Amidžić** zasluženno je stekla titulu stipendistice mjeseca ističući se svojim posvećenim radom.

Mahira Amidžić porijeklom je iz Kaknja, a već osam godina stipendistica je Fondacije Hastor. Njeni afiniteti su prirodne nauke, strani jezici te književnost. Nakon završene srednje škole Mahira je nastavila svoj akademski put upisom na Stomatološki fakultet Univerziteta u Sarajevu. Trenutno je treća godina studija, a njeni ciljevi usmjereni su na istraživačke projekte i potragu za znanjem.



U okviru Fondacije Hastor Mahira je najprije volontirala kao mentorica, a potom je svoj volonterski angažman nastavila u administrativnom timu u kojem se svakodnevno ističe svojom marljivošću i predanošću, što joj i donosi vrijednu titulu Stipendistice mjeseca:

*Kada je riječ o mom volonterskom radu, istinski uživam u aktivnom doprinosu društvenoj zajednici. Pored volontiranja u Fondaciji Hastor, volontiram i u Domu za djecu bez roditeljskog staranja na Bjelavama, a aktivna sam članica i Crvenog križa. Zahvaljujući Fondaciji Hastor prošla sam kroz sve faze volontiranja – od učenice do mentorice. Volontiranje s učenicima omogućilo mi je razvoj komunikacijskih vještina, razumijevanje osjećaja drugih i međusobno dijeljenje znanja. Pripremajući se za volonterske sastanke, osim što sam pomagala djeci da uče, i sama sam učila. Također, volontirajući s učenicima u lokalnoj zajednici, imala sam priliku upoznati mnogo novih ljudi, ali najvažnije je to što sam stekla osjećaj da je moj angažman vrijedan i da njime značajno doprinosim društvu u kojem živim. Trenutno sam aktivna članica administrativnog tima, u kojem se timski rad ističe kao ključni segment naše produktivnosti.*

Mahira ističe kako je kroz koncept volontiranja u Fondaciji Hastor stjecala želju za pomoć zajednici i okruženju u kojem živi i djeluje razvijajući, pritom, i empatiju kao jednu od najvažnijih ljudskih osobina:

*Najbitnije stvari koje me naučila Fondacija Hastor tokom samog volontiranja jesu odgovornost, preciznost i humanost, što predstavlja i bit samog ljudskog postojanja – širenje dobra i spremnost na nesebičnu pomoć – jer samo ljudsko biće koje je istinski humano spremno je pružiti ruku onda kada je to potrebno drugom ljudskom biću.*

Na samom kraju, Mahira ima veoma važnu poruku za naše stpendiste i uopće mlade ljude:

*Moja poruka mladima, prije svega, jeste da prate svoje snove i nikada ne odustaju od njih jer samo takvim načinom bivamo otvoreni za nove prilike, izazove i kontinuirani razvoj. Mladost je vrijeme za istraživanje različitih mogućnosti i pronalaženje svog puta. Pronađimo ono što nas pokreće i strastveno se tome posvetimo.*



Članak pripremila: **Semina Sadiković**

## Adelisa Begić

Rubrika aktivnih mladih (RAM) prostor je koji ispunjavamo pričama o najuspješnijim stipendistima Fondacije Hastor, o onima koji sebe nesebično daju za druge i doprinose svojoj zajednici uz nadu da ovaj svijet postane ljepše mjesto za život. Svojim angažmanom stalno podsjećaju i nas i sebe koliko im znači podrška Fondacije Hastor i koliko su ponosni na to što su dobili priliku da njihov altruizam dopre do širih narodnih masa. Jedna od njih je i naša **Adelisa Begić**, stipendistica koja dostojanstveno nosi tu titulu i s ponosom napominje koliko joj Fondacija Hastor uljepšava svaki momenat života.

Adelisa dolazi iz Jajca, gdje je provela djetinjstvo te završila osnovno i srednjoškolsko obrazovanje. Trenutno je završna godina na Fakultetu zdravstvenih studija u Sarajevu – smjer Radiološke tehnologije. Njen angažman u Fondaciji Hastor traje osam godina. Iako su godine često samo broj, biti član Fondacije Hastor osam godina znači imati potpuno pravo istinski se osjećati članom ove porodice. Tih osam godina Adelisi je, kako kaže, donijelo mnoga dobra, a i učinilo ju je empatičnom, odgovornom, ograničavanom i posve predanom osobom. U okvirima Fondacije Hastor Adelisa je volontirala na različite načine i tako stjecala iskustva i poznanstva. Dvije godine bila je mentor srednjoškolcima iz Jajca, a povremeno je pisala i tekstove za bilten. Iako je odabrala studij iz sfere medicine, ljubav prema pisanoj riječi osjeća još od srednjoškolskih dana, pa je još u drugom razredu srednje škole objavila svoj prvi ljubavni roman pod nazivom *Tvoja ljepota mijenja svijet*, a na drugoj godini fakulteta objavila je i svoju drugu knjigu *Kad mladost stvara*, koja je hibrid poezije, proze i drame.



Kako Fondacija Hastor cijeni talente svojih stipendista i pruža im priliku da iste razvijaju koliko god je moguće, Adelisa je dobila šansu da svoje iskustvo i ljubav prema književnoumjetničkom stilu nastavi razvijati pisanjem tekstova za bilten. Godinu dana bila je aktivni član redakcijskog tima, a od novembra 2023. godine, zahvaljujući njenom umijeću, volontira kao urednica našeg biltena. Osim prilike za usavršavanjem onoga što najviše voli, volontiranje u redakcijskom timu pomoglo joj je da upozna nove ljude koji su spremni pružiti pomoć u bilo kojem trenutku. Tako je u Fondaciji stekla prijatelje za cijeli život – neke od njenih mentorica postale su joj najbolje prijateljice.

*Slobodno mogu reći da je slika Fondacije Hastor iz perspektive urednice biltena i vođe redakcijskog tima posve drugačija u odnosu na onu koju sam imala kao mentorica. Osjećam da sam na ovaj način još bliža Fondaciji Hastor jer svakodnevno imam priliku pisati i uređivati pozitivne priče koje se rađaju u njoj. Koncept volontiranja u Fondaciji Hastor uveliko predstavlja moju ličnost, a humanost, odgovornost i organizacija osobine su koje sam godinama kroz volontiranje dodatno gradila.*



Njen rad, trud, aktivnost, marljivost i ažurnost u volonterskom angažmanu Fondacija Hastor nagradila je posebnom zahvalnicom za jednog od 20 najaktivnijih stipendista Fondacije. Osim u Fondaciji Hastor, Adelisa je uspješna i u drugim organizacijama, pa je tako, dok je još pohađala Srednju medicinsku školu, povremeno pisala članke za COD Jajce, tačnije, njihov portal „Jajce Press“. Volontiranje ju je naučilo konstantnom širenju empatije i altruizma, pa je 2023. godine volontirala s djecom bez roditeljskog staranja u Dječijem domu Bjelave, što odražava sve one pozitivne osobine na kojima Fondacija Hastor insistira – biti dobar čovjek i izvan Fondacije.

Pored Fondacije Hastor, Adelisina podrška u svemu su njeni roditelji i sestra, bez čije podrške danas ne bi postigla sve ove uspjehe.

Na kraju, ističe da je najbitnije provesti život, pogotovo mladost, u onom što nas ispunjava:

*Poenta života je da živite, a ne da se gušite! Vrijeme brzo prolazi i upravo je zato bitno da u ovim najljepšim godinama života radimo stvari koje volimo, koje nas ispunjavaju, stvaraju nam mir u životu i duši te pomažu da svakim novim iskustvom izgradimo najbolju verziju sebe. Greške su tu da na njima učimo, a ne da nas sputavaju ka novim uspjesima.*

**Članak pripremila: Aldina Šaljić**

Alumnisti Fondacije Hastor najbolji su odraz njenog plemenitog djelovanja sve ove godine. Generacije mladih i obrazovanih ljudi, koji su bili stipendisti Fondacije Hastor, ostaju joj privržene i godinama kasnije, što je egzemplaran primjer pravih prijateljskih veza koje nastojimo graditi s našim stipendistima. Da Fondacija Hastor njeguje plemenite i čvrste odnose sa svojim stipendistima i nakon završenog formalnog obrazovanja, dokaz je i naša ovomjesečna alumnistica **Alma Drina**.

Alma dolazi iz Bugojna, gdje je završila osnovnu i srednju školu, nakon čega je svoje akademsko obrazovanje nastavila u Sarajevu. Odlučila je širiti svoja znanja na polju primijenjene matematike na Prirodno-matematičkom fakultetu Univerziteta u Sarajevu, gdje je stekla i zvanje bakalaureata primijenjene matematike.


Informaciju o konkursu za studente stipendiste Fondacije Hastor, Alma je, kako kaže, pročitala na oglasnoj ploči svog fakulteta. Društvene mreže u to vrijeme nisu bile toliko aktuelne te su informacije o konkursu bile dostupne isključivo na ovaj način. Alma nije imala visoka očekivanja, ali je ispunjavala sve uvjete za apliciranje za stipendiju. Kako i sama kaže, poziv Fondacije predstavljao je neizmjernu prekretnicu u njenom životu.

Volonterski segment ponajviše je ohrabrio Almu da traga za svojim uspjehom i piše stranice novog životnog poglavlja. Za nju je volontiranje humani čin i direktan razvoj navika da se pomaže drugima. Volontirala je kao mentorica učenicima, ali i u prostorijama Fondacije Hastor.

Pripala joj je posebna čast da odgovara na pisma učenika, a svoj zadatak prihvatila je s mnogo empatije i razumijevanja:



*Moj zadatak bio je odgovarati na pisma stipendista, a ta divna dopisivanja pružala su nam dodatnu motivaciju za pisanje još ljepših odgovora. Djeca koja su nam slala pisma tražila su savjete od odraslih (u njihovim očima to smo bili mi) i bilo mi je veoma važno posvetiti se svakom pismu. Također, kroz Fondaciju sam upoznala mnogo divnih ljudi koji danas postizu izvanredne uspjehe. Svi smo imali snažnu motivaciju za napredak i mislim da smo u tome uspjeli.*



S obzirom na to da se njeni počeci u Fondaciji vežu za studentske dane, dobila je i mentorsku ulogu. Kroz taj angažman unaprijedila je svoj stepen odgovornosti, ali se i uvjerila u poznatu kraljicu da je dobra priprema pola posla.

Almin posao iz snova je, kako kaže, pozicija FileMaker Developera. Iako je provela osam godina u administrativnom poslovanju, plašila se promjene, ali, kako i sama kaže, u svoje snove trebate čvrsto vjerovati jer smo upravo mi najvažnija karika koja oblikuje našu budućnost. Za pet godina naša alumnistica vidi uspješniju verziju sebe na privatnom i poslovnom planu, uz želju za sakupljanjem što više znanja i iskustava jer je, kako ističe, cijeli život jedna velika prilika za učenje.

Fondacija Hastor joj mnogo znači te je, zahvaljujući njenoj podršci, ostvarila značajan uspjeh. Dodijeljena stipendija i volontersko iskustvo olakšali su joj obrazovanje, ali i prvo zaposlenje. Asocijacija na Fondaciju Hastor je prijateljstvo, podrška i oslonac i uvijek će se tako sjećati svoje druge porodice.

Na kraju, donosimo vam Alminu poruku mlađim stipendistima:



***Dragi stipendisti, izabrani ste s razlogom da budete dio ove zajednice. Molim vas, iskoristite tu priliku, uložite u sebe i svoje znanje i uvijek nastojte dati sve od sebe. Sve će se na kraju posložiti onako kako treba. Istražujte i otkrijte ono u čemu ste dobri i što vas ispunjava jer je to pola puta do uspjeha. Važno je shvatiti da će život donijeti i uspone i padove, ali ključ je u tome da vaša upornost bude nepokolebljiva. Nemojte nikada odustati i hrabro se borite za svoje snove.***





# Svjetlo dobrote se ne gasi nikada ako svoj plamen dijelimo s drugima

Volontiranje ostavlja dubok utisak na pojedinca, pružajući priliku za lični rast, umrežavanje i doprinos društvu. Kroz volontiranje volonteri zajedničkim snagama rade na poboljšanju zajednice i stvaranju pozitivne promjene u svijetu oko sebe. Ovomjesečna rubrika Male priče velikih volontera pripremljena je na nešto drugačiji i posebniji način te vam u ovom tekstu donosimo iskustva naših mlađih stipendista koji su u toku mjeseca aprila sa svojim mentorima volontirali u okviru projekta „Punoljetstvo Fondacije Hastor u znaku dobročinstva“. Koliko njima znači volontiranje u zajednici i kakve uspomene nose s volontiranja, saznajte u nastavku.

Ajla Hasanović i Alma Osmanović volontiraju s dvjema grupama učenika – srednjoškolcima i osnovcima iz Tuzle. Ovaj mjesec naše vrijedne mentorice sa svojim učenicima odlučile su pripremiti obroke za osobe kojima je to potrebno. Zajedničkom snagom i voljom, unoseći posebnu vezu ljubavi i empatije, mentorice su sa srednjoškolcima napravile čokoladne hurme i sendviče, a s osnovcima su to sve spakovale i podijelile. Učenici su bili posebno oduševljeni ovakvim vidom volontiranja.

Amina Džananović, učenica Srednje medicinske škole Tuzla, novim volonterskim iskustvom spoznala je sebe i druge oko sebe i osnažila svoj osjećaj empatije prema drugima:

*Volontiranje naših mentorica zajedno s nama u ovom mjesecu bilo je dosta drugačije od dosadašnjih. U Fondaciji Hastor nešto sam više od pola godine, za razliku od ostalih učenika koji su tu čak i od osnovne škole, ali bez obzira na to, u dosadašnjem periodu sva ta volonterska iskustva bila su drugačija i zanimljivija. Ovomjesečno volontiranje omogućilo mi je da bolje spoznam sebe i druge oko sebe, da osnažim svoju empatiju i pojačam brigu o drugima. To za mene nije predstavljalo samo kupovinu, pakovanje i dijeljenje prehrambenih proizvoda, već doprinos zajednici, drugima oko sebe, ali, samim time, i dobro djelo.*




*Kako sam došla u novu grupu, volontiranja su postala mnogo zanimljivija i zabavnija. U aprilu smo pakovali hranu i dijelili ljudima koji je sebi ne mogu priuštiti. Tog dana osjećala sam se veoma lijepo i ispunjeno, bilo mi je drago što smo barem malo pomogli drugima,* istakla je Alice Dizdarević, učenica osnovne škole.

*Kada smo se svi okupili, razgovarali smo o školi i vanškolskim aktivnostima. Nakon toga, igrali smo igru s pitanjima i odgovorima te imali kratku pauzu za užinu. Nakon užine smo spakovali šest obroka koje smo podijelili ljudima na trgu. Bila sam veoma sretna što smo pomogli onima kojima je pomoć potrebna te što smo učinili dobro djelo,* ponosno je kazala Melina Joldić.

Osim Ajle i Alme, naše vrijedne mentorice Alma Ahmetović i Džejlana Smajić svoje ovomjesečno volontiranje podigle su za ljestvicu više. One volontiraju u Zvorniku s osamnaest osnovaca i tri srednjoškolca. Njihovo volontiranje započelo je sakupljanjem otpada, razvrstavanjem plastike, papira i stakla pa sve do pravljenja hranilica za životinje od plastičnih flaša i hranjenja životinja. Učenici su se zabavili te stekli nove vještine i iskustva, što se može primijetiti na osnovu njihovih utisaka koje su podijelili s nama:

*Sa svojim mentoricama Džejlanom i Almom volontirala sam u lokalnoj zajednici. Na tim radionicama sakupljali smo otpad, hranili životinje i pravili im kućice. Za mene je to bilo jedno prelijepo iskustvo, osjećala sam se veoma sretno i zadovoljno jer smo se ujedinili i činili takva dobra djela, kako za životinje tako i za ljude. Nadam se da ćemo na sljedećim radionicama uraditi još mnogo toga kako bismo usrećili druge oko nas,* kazala je Ajla Sahanić.





*Osjećao sam se zadovoljno i ispunjeno dok sam volontirao u lokalnoj zajednici. Vidjeti životinje zdrave i sretne zbog našeg truda činilo me veoma ponosnim, rekao je Jasmin Lolić.*

Naša treća volonterska grupa sastoji se od tri mentora: Dženite Ibrahimović, Saide Ibrahimović i Ibrahima Hidića. Oni su organizirali akciju čišćenja obale rijeke Drine u Zvorniku. Iako je prisustvovao mali broj učenika, svega troje, mentorica ističe da su proveli kvalitetno i svrsishodno vrijeme, što potvrđuju i učenici:

*Prije svega, želim kazati da je Fondacija Hastor jedna posebna ne samo zajednica već i porodica koja spaja i umrežava mnogo učenika širom Bosne i Hercegovine. Zahvalna sam joj na tome. Što se tiče volontiranja s drugim učenicima, za svoje tri godine stipendiranja mogu reći da je to jedno divno iskustvo i da je, prije svega, veoma pohvalno i humano što sa svojim mentoricama i drugima stipendistima pomažemo životinjama i čistimo prirodu oko sebe. Također, veoma je lijepo družiti se s drugima i dati svoj doprinos poboljšanju kvalitete življenja, istakla je Melisa Sarajlić.*

*Ovomjesečno volontiranje bilo je zanimljivije od svih prethodnih. Uvijek kada treba ići na sastanke, radujem se jer znam da će mi donijeti nešto korisno. Družili smo se, ali i doprinosili okolini. Volontiranje mi mnogo znači, kazala nam je učenica Lejla Džilić.*

Učenica Adna Tulić oduševljena je idejom i počastvovana time što je bila dijelom ovog projekta:

*Bilo mi je veoma lijepo na ovoj radionici. Zabavljali smo se i kupili otpad pored Drine te je učinili čistom i ljepšom, dodao je Enis Dedić.*

*Volontiranje je predivan način da se pomogne okolini. Čast mi je što sam bila dio ovog projekta jer sam uživala dok sam čistila našu lijepu Drinu i dok sam pravila kućice za životinje. Naravno, ništa to ne bih mogla bez pomoći drugara i naših vrijednih mentorica. Osjećaj zadovoljstva je neprocjenjiv.*

*Meni je bilo super! Iskoristila sam priliku da očistim našu okolinu, ali i da naučim nešto novo, kao i na svakoj radionici. Veselim se novom volontiranju u zajednici i potajno priželjkujem da to ponovno bude na rijeci Drini, napomenula je Alma Avdić.*



Emira Imamović i Fatima Musa su sa svojim učenicima odlučile volontirati u Domu za djecu bez roditeljskog staranja na Bjelavama. Odnijeli su im slatkiše, družili se s njima i na taj način unijeli određenu dozu radosti u njihov život. Mentorica Emira istakla je da vrlo često, i mimo volontiranja, posjete Dom, jer je nemoguće ne osjetiti povezanost i energiju s čistim srcima te djece. Kako su učenici doživjeli ovo volontiranje, saznajte u nastavku ovoga teksta.

Za Adnu Hajdarević ovo volontiranje bilo je posebno zadovoljstvo:


*Volontiranje u Domu za djecu bez roditeljskog staranja za mene ima poseban značaj, budi mi posebne emocije i uvijek se rado družim s djecom. Pažnja koju im pružimo tokom igre i druženja mnogo im znači i, kao što oni vole provoditi vrijeme s nama, i meni je posebno zadovoljstvo bar na neki način činiti da se djeca lijepo osjećaju tokom naših druženja. Sviđa mi se volontiranje u lokalnoj zajednici, osjećam se korisno i lijepo nakon svakog našeg volontiranja, a naša mentorica se uvijek potruđi da osjetimo to da smo važna karika, kako u Fondaciji tako i u društvu.*

O benfitima volontiranja srednjoškolka Kanita Avdović kazala je sljedeće:

*Volontiranje u lokalnoj zajednici za mene je poseban vid volontiranja. Sviđa mi se kako te aktivnosti utječu na mene. Osjećam da koristim društvu, a upravo taj osjećaj mi podiže raspoloženje pa imam želju što češće činiti dobro za druge. Tokom volontiranja uvijek se dobro zabavimo i družimo te učinimo nešto korisno.*

*Sretna sam što imamo i ovaj način volontiranja – u lokalnoj zajednici. Uvijek rado dolazim na te sastanke. Volim što mogu dati svoj doprinos zajednici, uljepšati okolinu ili nekome dan, u zavisnosti od načina volontiranja, za kraj nam je napomenula učenica Tajra Bejdić.*

Članak pripremila: Aida Suljić




## Putovanje

*Kako je samo lijepo proći  
Nekom novom ulicom ili sokakom  
I sa svakim novim korakom  
U novo i neistraženo doći.  
Vidjeti ljude drugačijeg lika  
I sačuvati u mislima mnoštvo slika  
Cvijeta, rijeke, šetalista toga grada  
Magičnog neba dok noć lagano pada*

*Kako je samo lijepo biti  
Mali katanac zahrđao od kiše  
Koji krije priču o ljubavi koja i sad traje  
Priču o snazi koja svijetu ne da da stane  
Ili jedan mali vatromet  
Jarkih boja na crnome nebu  
Koji budi sreću, koji daje nadu  
Da ćemo i mi voljeti, makar u dalekom gradu*

**Nikolina Stanar**



**FONDACIJA**  
HASTOR



### Kontaktirajte nas!

Bulevar Meše Selimovića 16,  
Sarajevo  
033 774 789  
033 774 823  
fondacija@hastor.ba



### Redakcija

Almina Šabanović-Kokot  
Adelisa Begić  
Semina Sadiković  
Aldina Šaljić  
Hana Kolasević  
Aida Suljić  
Nikolina Stanar  
Hana Hajrić



### Grafički dizajn

Sara Keserović



### Naslovnica

Nejla Dedić